



# Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 7

Yangia anidakangma :



Tir Yimym



tir\_yimym



tir yimym

TAPAK 8

**Israel nunger sepaitemi  
Nuseirat refugee camp amak**

**Arishi kum 16 tain Gout-i 200m  
asemtepha nung otsu tasen yanglu**



VOL. XXII ISSUE NO. 59 (ADOK 59)

DIMAPUR

AMUNGNÜ (SUNDAY)

LUCHII (DECEMBER) 08, 2024

₹ 5.00

## Union Minister Mandaviya-i Nagaland tobur ajung aser sobaliba senmang nukshir

**Kohima, December 7, 2024 (TYO):** Union Minister for Labour & Employment and Youth Affairs & Sports, Mansukh L. Mandaviya-i Nagaland nung alirtem den külemi alima tobur ajung aser sobaliba senmang kanga nukshia repringba metetdaksüogo.

Honibarnü Indira Gandhi Stadium nung Labour & Employment and Youth Affairs & Sports department tem den külemi sports associations 24 nungi teshimtet nübotem den senden ka amendang pai iba ya ashi.

Union Minister Mandaviya-i anogo ananü atema Nagaland semdangi arua lir aser pai 25 buba Hornbill Festival nung shilem agitsü.

Nagaland dang 'Land of Festivals' ta aser iba ya nübotem temeyoktep aser telongjem nung aliba benjung ka lir. Nagaland nung alirtem ya alemli sobaliba

kümzüka ayurtem dang masü saka India tejakleni aoba aser ajak adenba loktiliba yangerteter lir ta pai ashi.

"Iba benjung nung Naga nunger nokinketertem tsüngsangba den handloom mapa tajung aser chiyung tanang ajanga India nung sobaliba temeyoktep kuli agütsür. Iba ajanga asenok temeyoktep süaka longjema aliba aser asen külem senmang wazüka ayutsü tashi itdaksür" ta Union Minister-isa ashi.

"Prime Minister Narendra Modi mangdang aketba lenisüba kübok linük ya global sports nung tetokteper tajung ka kumogo. Tesüiba kum ter tsüngdang India-i Olympics, Paralympics, aser international tournaments nung takok tajungtem ngutetba ajanga alima sabang nung tetokteper tajung ka kumogo" ta Mandaviya-isa metetdaksü.

Centre sorkari 2018 kum tenzükba Khelo India Program

amala mapatem ajanga saisapongbaren jenjang yanglushir. Iba Program ajanga jenjang teküpoktiba nungi saisapong ajungketer aser sempet aketba lanurtem ajiteter. Külen, 2014 kum tenzükba Target Olympic Podium Scheme (TOPS) ajanga Olympic medals nung takok angutsüpur saisapongertem yarir, ta pai ashi. ASMITA Khelo India Women's League ya tetsür-tebur kasa ta asüba tangatetba nung ajemdaker tenzük aser iba ajanga tetsür saisapongertem ajungmesor ta Union Minister-isa ashi.

Khelo India Rising Talent Identification (KIRTI) Programme ajanga sempet aketertem jangjatsü atema technology amshir aser iba ajanga India nung tanur shiai saisapong nung shilem agitsü maongka agütsür. India nung e-sports jenjang kanga junga akümer aser iba ya multi-sport events nung shilem ka kumogo, ta pai ashi.

Sorkari e-sports pusema nungitsü aser India ya digital sports tongti ka kümdaksüba nung yaritsü. Sorkari nungita yariba mapang Nagaland-i sporting arena nung maneni shilem tajung agitsü amanger, ta

Mandaviya-isa metetdaksü. Advisor to Chief Minister aser Nagaland Olympic Association (NOA) Secretary General Abu Metha-i Nagaland nung saisapongbaren kanga tejakleni aoba osang lemsatetep.

2004 kum Indian Olympic Association nung Nagaland züngsem aser iba sülen nungi Nagaland nungi saisaponger tajungtem anitetogo aser pamoki national o international levels nung takok tajung ngutetogo, ta pai ashi.

North East region nungi Mary Kom aser Lovlina Borgohain nunger amala saisapongertemi India asoshi konang bentsür aruogo ta Metha-i ashi.

Nagaland nung saisapongba ya telongjem adoktsüba tashi ka ama lir aser distric 17 nungi saisaponger 8,000 temai kum shia Nagaland Olympic Games nung shilem agir, ta paisa ashi.

Nagaland Olympic Association-i aiben infrastructure development atema mepishiogo aser iba nung Dimapur nung multi-disciplinary sports complex nungi Sports Authority of India Centre of Excellence ka akümtsü dena lir. Nagaland-isa national competitions nung belt wrestling ama lisopur saisapongtem bendenloktsü mepishiogo ta

Metha-isa ashi. NOA-isa Nagaland nung contact aser combat sports nung temulung agüja Khelo India Centers talila lapoktsü mepishiogo. Ano northeast nung hockey infrastructure renloktsü aser Nagaland nung hockey turf ground ka nungdakba lemsatetepogo ta pai metetdaksü.

Iba senden nung YRS aser Labour & Employment Department temi power-point presentations ajanga osang balala lemsatetep.

Union Minister Mandaviya-isa Indira Gandhi Stadium nung central point nung süngdong ka tema yutsü.

Tanü Dimapur Airport nung Skill Development, Employment & Excise and Youth Resoruces & Sports Advisor Moatoshi Longkumer-i Dr. Mansukh Mandaviya pelaa agizüka liasü.

Dimapur Airport nungi pa helicopter ka nung Kohima-i atu aser anüngdang Nagaland Governor La Ganesan den ajuruteper.

Union Minister Mandaviya-i Deobarnü Hornbill Festival nung shilem agitsü aser Commonwealth War Cemetery dena Kohima nung tongtipang tesemtem sema senzütsü.

## Dimapur nung odd-even system tenzüksü

**Dimapur, December 7, 2024 (TYO):** Benjung mongpu nung traffic timtem ajuruba den Road Over Bridge (ROB) yangluba ajanga Dimapur Police-i odd-even system tenzüksüba osang metetdaksüogo.

December 10 anepdang 9:00 ako nungi nikongdang 6:00 ako tashi Dimapur Municipal telongtet nung iba inyakyim beshitsü ta Commissioner of Police Dimapur, Kevithuto Sophie-i sangdong ka nung ashi.

Dimapur Municipal telongtet nung ita ka mesüra ROB mapa metembang tashi two wheelers dena gari ajak odd-even system ama senzütsü, ta pai ashi.

Registration number (1,3,5,7 & 9) aketba garitem odd dates

(1,3,5,7 & 9) nung senzütsü aser registration number (0,2,4,6 & 8) aketba garitem even dates (0,2,4,6 & 8) nung senzütsü ta Dimapur Police-i metetdaksü.

Ajisüaka iba tenokdangba ya Deobar anogotem, December 25 aser January 1 (New Year) nungbo malitsü ta parnokisa ashi.

Sorkar garitem, emergency service garitem, school bus aser auto rickshaws medeni two-wheeler taxis dena public transport iba tenokdangba kübok madener.

Iba tetuyuba sülen manidakertem Motor Vehicle Act 1988 nung lateta aliba ama temerenshi alitsü ta Dimapur Police-isa nenshia metetdaksüogo.

## Dimapur Airport tajungba akümtsü: AAI

**Dimapur, December 7, 2024 (TYO):** Dimapur airport nung infrastructure mapa kar inyaktsü aser March 2025 tashi nung iba mapa tembangtsü ta Airports Authority of India (AAI)-i metetdaksüogo.

Dimapur airport nung Business Association of Nagas (BAN) teshimtet telok ka den senden amendang AAI Regional Executive Director, Guwahati M. Raja Kishore-i iba osang lemsatetep.

BAN-i Dimapur Airport nung infrastructure development kanga rongdak nungdaker ta ashiba atema iba senden amen.

Regional Executive Director Raja Kishore-i tanü Dimapur airport terminal building yangluba repringdang aser March, 2025

tatemlen iba mapa tembangtsü ta ashi.

Dimapur Airport ya India nung major airports den kasa jenjang akümtsü atema sentong atongdar saka iba atema ali talila nungdaksü ta paisa ashi.

Senden nung BAN-i Dimapur airport nung cargo infrastructure development, enhanced road connectivity, modernization of airport facilities aser local entrepreneur stall alitsü nungdakba lemsatetep.

AAI telokisa Kohima nung Nagaland Chief Minister den ajuruteper aser Dimapur airport ya international standards jenjang nung ajungkettsü atema ali dak sendakba tebilemstütem lemsatetepa liasü.

## Jemtimenba Mollier Foundation-i Ao oshi nung tematiba takok angur tushi



Tanü Ao Senden Kilem Mokochung nung Jemtimenba Mollier Foundation(JMF) Kümzüng Ter Abensaba Nüngtem aser Tenren Balala nung Takok Angur Tushiba Sentong nung tenren balala nung senpet agizüker JMF pura ser sentong nung shilem agirtem külemi tangokba noksa nung angur.

**Mokochung, December/ Luchii 07 (TYO):** Tanü Ao Senden Kilem Mokochung nung Jemtimenba Mollier Foundation (JMF) Kümzüng Ter Abensaba Nüngtem aser Tenren Balala nung Takok Angur Tushiba Sentong JMF teloki ayongzuka kaogo.

Tanü iba sentong nung Ao Senden Tir Wb. Marsanen Imsong-i Ni Ya shinür ta sür jembidang oshi ya meimchir nem Tsüngremi agütsüba lir. Aser yamaji nisung ka masodang nungi oshiji yuja lir. Anungji oshiji kin ka senso nübur ajak külem meyong. Nisung ka pa/la

kechi kin? Oshi agi meteter. Koyimer Osü agi meteter. Anungji oshiji pei sobaliba mezüng tamendakdak lir. Aser shiba pei oshi mashi/mejembitet pa/la pei ayak samadaksür ta ashi.

Oshi ka wazüka ayutsü mezüngbuba meraji pei atep lir. Alemlibo tsürabur tanur külemi atep nung maküm nung menteper tetsü chi mesüker Aon kenoker agütsüba chiyong dang chi den külemi chiyongsema sayutsüngi, sobaliba, libaliro anganüa agütsüba angazükba den külemi oshi aser sobaliba dena angazüka aru. Anungji Oshi

asoshi atepi meyip ama tanü putu nunga kinünger ajak chiyongba langpang nung külemi mener chiyongdang oshi, sobaliba, awashi aser libaliroyim chi den chiyongsema sayutsüla ta Ao Senden Tir-isa telok den teinyaktsü khuret kar lemsatetep.

Ao Senden Tir-isa asen Ao oshiopen tali taroktipa nung wazüka yudi ta süra Aor yimtsüng shia osü aser jayajako balala aika lir, aser ajakji Ao oshi lir. Anungji pei yimer sasep senden ajak nung pei yimer osü agi jembiba agi oshi aser osü wazüka yutetsü ta metetdaksü. (Maneni tapak 2 nung...)



### Nagaland nung 100-Day TB Elimination campaign amenokogo



**Dimapur, Luchii/December 7 (TYO):** Department of Health & Family Welfare, Nagaland-i December 7 nü Seikhazou, D. Khel Ground, Kohima nung 100-Day Intensified Campaign on TB Elimination (Ni-KshayShivir) sentong amenokogo.

Linük ajunga nung 2025 küm tashi nungbo tuberculosis (TB) tashidak meshi meshia samtsütsü nükjdong yur aliba nung shilem ka ama iba sentong amenokogo. United Nations' Sustainable Development Goals-i TB tashidak ya 2030 küm tashi nungbo meshimeshia samatsütsü sentong yanglur lir.

Iba campaign tenzükba sentong nung o jembiba mapang Health Minister P. Paiwang Konyak-i, 2025 küm tashi nungbo state nungi TB tashidak meshi meshiasamatsütsü bendanga agütsür lir ta ashi. Pai, tashidak samatsütsü asoshi sorkar agency tem, NGO tem, healthcare agütsürtem aser nüburtem longjemer inyaksü koda tongtibang iba indang lemsatepa liasü.

Minister-isa, iba campaign benoka inyaka takok angutsü atema senotsü teyari peria agütsütsü, ta ashi.

Kasa mapang nung MLA Dr. Tseilhoutuo Rhutso-i, TB tashidak samatsütsü atema longjemer inyaksü nüngdakba lemsatep. Paisa, TB ya ajaki

meteta aliba tashidak ka aser yimya agi tepokpok nung atemer ta meteta lir, ajisüaka iba tashidak ya teküp, teret, tekelok aser tar amala nunga atemer, ta ashi.

Dr. Rhutso-i, nüburtem dang iba sentong nung yakyaka shilem agitsü mepeshiba den iba campaign takok asoshi paia takok tashi teyari agütsütsü tenangzükba agüja liasü.

Maneni Advisor, Dr. Kekhrielhoulie Yhome-i, TB tashidak samatsütsü atema tetsükdaktsü ajangshibatam indang lemsatepba den meranga inyakdangaka taoba mapang nükjdongtem metongteti tamakok ngua aruogo, ta ashi. Pai India indang 100-day TB Elimination Campaign indang lemsatepba den stakeholder tem dang iba sentong takok ngua inyaksü atema tetsükdaktsü alibatam bentettsü aser policy balala nung tawa alibatam jangja-a jenjang tapet agitsü ayongzük.

Sentong nung lokti pela agizükba o jembiba mapang Anoop Khinchi, IAS, Commissioner & Secretary of Health & Family Welfare-i, TB tashidak samatsütsü kodang tongtibang iba indang lemsatep aser ashiba agi, iba tashidak ya India nung public health dak sendakba nung tetsükdaktsü tulutiba lir ta ashi.

Nagaland nung 2023 küm nisung 4,229 dak TB tashidak potet aser taküma nisung 3,018 dak tashidak potetogo.

Dr. AkuoSorhie, MD (NHM)-i ashiba agi, iba campaign ya tashidak menatsü ana nung aliba nüburtem dak rangloker inyaksü, kong TB agi shiranger den alirtem, HIV mesüra diabetes tashidak keta alirtem aser tantsür tamburtem densema lir.

AI-based X-ray screenings aser molecular testing amala advanced diagnostic tool temi tashidak takaratiba nung putettsü atema tongtibang shilem agitsü. Campaign ya nutritional support daka rangloker inyaksü, kong Pradhan Mantri TB Mukh Bharat Abhiyan kübok shirangertem nem ita nung sen 1000 agütsütsü.

Iba campaign amenokba sentong nung Nikshay Mitras aser TB Champions tem nem tetushi agütsü aser chiyongtsü lemja liasü. Health Minister Paiwang Konyak-i Ni-KshayVahan flag-off sütsüba sülen iba sentong tembanga liasü. Sentong nung MLA tem aser lokti tentet balala lenirtem, ketdangsurtem aser nüburtemi shilem agia liasü.

Iba campaign ya 2025 küm March ita tashi inyaksangshitsü, koba TB dak sendakba nung tangazükba balala agütsütsü nükjdong nung amenokogo.

### "Run for Hornbill Against Time" sentong agiogo



**Dimapur, Luchii/December 7 (TYO):** Department of Environment, Forest & Climate Change-i ayongzükba December 7 nü "Run for Hornbill Against Time" sentong ayongzükba agiogo.

Kilometer 5.40 asemba sentong ya New Police Reserve Junction nung tenzük aser Kisama, Kohima nung tembanga liasü. Iba

asemtepba ya shilem aginertem ajak atema lapokja liasü.

*Teburtem rongnung takok angurtem:*

1st: Wede T Mero, 2nd: TsoleYhokha, 3rd: Shiangjiu T Khiamniungan, 4th: Sochiu S aser 5th: Wangnao

*Tetsürtem rongnung takok angurtem:*

1st: Tsuchoi T, 2nd: Niansai T, 3rd: Songmo P, 4th: CekrotaluKhesoh aser 5th: Vekholhulu.

Ajak senteper iba tetoktepba nung nisung 226-i shilem agia liasü. Tetokteperterongnung tanutsüla arishi küm 13 Helen aser tambusangji arishi küm 54 tain Khughavi Sema liasü.

### Visosieto-i jangzü aputepba tetoktepba kokogo

**Dimapur, Yimpoksüi/ November 7 (TYO):** Hornbill jangzü aputepba tetoktepba December 7 nü Kisama main arena nung agiogo, koba Angami Morung nungi defending champion Visosieto Vupru akok aser tanabuba nung Phom Morung nungi Chingpong aser tasembuba nung Konyak Morung nungi Wenlad Konyak liasü.

25buba Hornbill Festival 2024 nung jangzü aputepba tetoktepba nung kin balala indang morung 13-i shilem agia

liasü, kong tetokteper rongnung tanobusangji arishi küm 19 aser tambusangji Konyak kin nungi arishi küm 85 tain ka liasü.

Takokertem ya, sustenance, creativity aser melody nung ajemdaker tendanga liasü.

Iba tetoktepba ya Tribal Vision aser Department of Youth Resources & Sports, Nagaland na longjemer ayongzükogo.

Tribal Vision society ya 2012 küm tentet, koba amatoka oya aliba sobalibatam asingsashitsü nükjdong nung tenzükba lir.



Mon district kübok Changlangshu yimtsung nung sempet tajung aketba artisan aser entrepreneur Poangba Konyak-i Kisama nung pai yangluba muzzle-loading prangbong sayuba noksa nung angur. Tesemdangertemi Handloom & Handicraft Pavilion kübok stall No. 77 nung pa mapatem angutsü. Poangba-i taoba küma Hornbill benjung mapang prangbong yangluba nung pa sempet tajung sayuogo. Pai yangluba brangbong ya sen 9,500 nungi tenzükba angutsü.

### Jemtimenba Mollier Foundation-i Ao... (TAPAK 1 NUNGI...)

Sentong nung Tsüngrem lenisüba jazüka Rev.Sentimeren Asso.Pastor M T B A sarasadem,Jemtimenba Mollier nem tetushi agüja mejemba kendong koba Wb.I Anungba Sanglir-i mejem aser Samaro teloki atenba ken vedio JMF Züngsem Wb.I.Anungba Sanglir ajanga sayaja telok dang iba ken vedio sayua liasü, iba den ano Ao senden Tir Wb.Marsanen Imsong-i Jemtimenba Mollier Foundation Kümzüng Ter nüngtem kakat sayatsü JMF Kibur tenung nung Dr.Imlikokla ajanga mulungnen o jembiba aser ano Wt.Imtilemla Principal Impur Bible Seminary aser Sb.Tongpangmangyang Kichu Tir Ongpangkong Kaketshir Mungdang tenatia tepela o jembiba aser Tebenjem Kentener Clark Theological College teloki temeja ken ka tena tesenteper ajungmesoba den JMF Tezülor Wb.I.temjen Tzüdir ajanga JMF Senpet achayanga agütsüba den Tarur

Pela agizükba aser JMF ratet JMF mendenbuba Dr.Tali Imsong ajanga jembiba aser tatem nung Tsüngrem nem tenüngsang agüja Rev.Longri Yimyu ajanga sarasadema sentong tembangba den JMF Züngsem Wb.Aso Imsong ketdangsuba nung iba sentong agia liasü.

Taküm Jemtimenba Mollier Foundation nung senpet kuli kakat den sen agizükertem yamai liasü.

HSLC-2024 Ao Subject Topper senpet Kr.Talijungla Tzüdir, Dimapur Mission Hr.Sec.School.

HSSLC-2024 Ao Subject Topper Sb.Marnungtet, Queen Mary Hr.Sec.School.

Clark Theological Aolichen nung 2024 küm nungi Ao Subject agi tenzükba nung tajungtiba senpet Kr.Akumnaro Ozüküm.

Arangtet Diploma Tenren-2024 nung Kr.Imsanenla C.Jamir.

Arangtet Post Graduate Diploma Tenren nung Kr.Kajenmenla Jamir liasü.





December 07, 2024 nü Ahmedabad nung Gujarat Lok Seva Trust kum 35 ajungba anogomong sentong nung Union Home Minister, Amit Shah-i matamabensar ka ajurua jembidang tangokba noksa nung angur.

## MEA-i India nungertem dang Syria toktsür arutsü ajungshir

**New Delhi, Luchii/December 07 (Agencies):** Syria nung tensa ano tamajungba akümba sülen Ministry of External Affairs (MEA)-i India nungertem dang Syria linüki maotsü tekümdangtsü metetdaksüba den külemi yangji aliba India nungertem danga iba linük toktsür arutsü ajungshio, ta ketdangsertemi metetdaksü. MEA-isa sensotem den helpline number ka lemsatepogo. MEA-i sangdong ka ajanga, "Tang Syria tensa nung ajemdaker India nungertem dang sangdong tasen ka magütsü tashi iba linük jagi maotsü metetdaksür. Tang Syria nung aliba India nungertem danga

Damascus nung aliba Indian Embassy den helpline number +963 993385973 (WhatsApp nunga angutsü) aser email hoc.damascus@mea.gov.in ajanga tongtepratepa alitsü metetdaksür," ta metetdaksüogo. MEA-isa Syria nung aliba India nungertem dang tekaraba nung commercial tayimtsü ajanga iba linük toktsütsü metetdaksü. Iba linük toktsür moutetsüpur India nungertem danga kanga kümdanga alitsü aser akokba tashi kidang nungi mayazüksü metetdaksüogo. Osangbener den jembidang MEA otongdar, Randhir

Jaiswal-i, "Northern Syria nung tensa tamajungba akümbaji onoki mita repringdar. Tang India nung 90 shi Syria nung lir aser parnok rongnung 14 bo United Nations organisations balala nung inyakdar. Indian Embassy-i sensotem kümzüka alitsü atema parnok den maneni tongtepratepdar," ta metetdaksü. Tawa Syria nung telungpurtemi Aleppo yimti nung sepaitem aika khaseta iba yimti agiba sülen tensa tamajungba kumogo. Northwestern Syria nung telungpurtemi maneni Hama yimti-a agitsü nükjidong lir.

## Madhya Pradesh nung Class 12 nung azünger kati principal khaset

**Bhopal, December 07 (Agencies):** Hokolbarnü Madhya Pradesh state kübok Chhatarpur district nung class 12 nung azünger kaketshir kati par school nung principal khaset. Arrshi kum 17 kaketshir jati principal metsü-meshidaki aodang pa sülen anidaka aoba sülen ana nungi pa dak tekolak nung injang khaloktsü. Iba sülen pa principal meyong office telungi ia scooter jabi agiteter jena ao. Ajisüaka nikongdang Uttar Pradesh arrtsülen pa apu.

Pai Principal ji kechiba khasetar kuli memetet. School nung tesayurtemi ashiba agi, arrshi kum 55 school principal, Surendra Kumar Saxena ji temeim aketba nisung ka liasü aser pai kaketshirtem atema kanga nendaka inyak. Principal khasetsang'er kiji school nungi kilometer 10 shi dang pilar lir. Kaketshirsang dak yimya tamajung aliba agi tamalen Principal Saxena-i pa merenshir liasü. Saxena-isa tebu dangia aiben call süa

tanur mazüokba tebilemtsü lemsatepa liasü. Hokolbarnüa principal-i pa dang nai tashi mangara temerenshi agütsütsü, ta tekümdangtsü metetdaksür liasü. Pai Principal khasetba sülen scooter nungji jena ao saka Uttar Pradesh arrtsü atongtsü kilometer 30 shi dang lia police-i pa apu. Iba mapang nungjia pa ket nung pistol liasü. Pai pistol ji kechi nungi anguar police-i bushisüngdangdar.



Bangladesh nung Hindu nungertem anema inyakba tatalokbatem anema December 07, 2024 nü Jammu & Kashmir kübok Doda district nung telok kati longkak aيتدang tangokba noksa nung angur.

## 'Jubilee Year' sülen Pope-i India semdangtsü: George Kurian

**New Delhi, Luchii/December 07 (Agencies):** Honibarnü Union Minister of State for Minority Affairs, George Kurian-i, Roman Catholic Arogo nung tongti, Pope Francis-i 2025 kum Arogo Jubilee sülen India semdangtsüa akok, ta metetdaksü. 2025 kum Arogo Jubilee amongba sülen Pope-i India semdangtsü.

"Arogoi 2025 kum Yisu Khrista asoba Jubilee Küm amongtsü, iba sülen Pope-i semdangtsü ta Vatican-i metetdaksüogo," ta Kurian-i ashi.

"Onoki anguba osang apibo Jubilee kum sülen Pope Francis-i India semdangtsü. Pai tekeraba nung India semdangtsü onoki imlar," ta paisa metetdaksü.

Kurian-i, India-i Pope jaokogo aser Apulia, Italy nung G7 summit Outreach session mapang nung Ato kilonser Narendra Modi-ia Pope dang India semdangtsü mepishiogo, ta ashi.

Tanungba osang tejangjaji Vatican-i metetdaksütsü, ta Union Minister-i ashi.

Taküm September ita nung Goa nung minister Mauvin Godinho-ia, kobi melii Pope Francis-i India semdangtsü, ta metetdakja liasü.

Bodhbarnü Cardinal aser Archbishop of Goa & Daman, Filipe Neri Ferrao-i state Angh, P S Sreedharan Pillai dang, Pope dang India semdangtsü ajungshitsü asoshi Centre nungi official shidi ka yoktsü atema inyaksüla, ta mepishia liasü.

Taküm June ita nung Ato kilonser Modi aser Pope Francis na ajurutepdang Modi-i Pope dang India semdangtsü mepishia jaokba atema India nung Catholic putirtemi kanga melung süa pelaba lemsatepa liasü. 2021 kum September ita nung G7 senden alidanga Modi-i Pope dang India semdangtsü mepishia liasü.

Tamalen Catholic Bishops' Conference of India (CBCI)-i sangdong ka ajanga, "Modi aser Pope na ajurutepba atema onok kanga melung süa pelar. Iba ya alima nung democracy linük tulutiba nung lenir aser alima nung Catholic Arogo nung tongti lenir na tsüngda tesendaktep tsütsü temaitsü tuluka lir," ta metetdakja liasü.

## Nuclear attack submarine ana aser Rafale Jet 26 alitsü: Navy Chief

**New Delhi, December 07 (Agencies):** Linük nung nuclear attack submarine ana yanglutsü aser Rafale jet 26 den Scorpene submarine asem alizüksü atema Centre sorkari agizükogo, ta Navy tongti, Admiral Dinesh Tripathi-i metetdaksü.

Osangbenertem den jembidang Admiral Tripathi-i, Navy sepaitemi Indian Ocean nung China nung navy sepaitem inyaksangshi ajak tenük yoka repringdar, ta metetdaksü.

Paisa, Pakistan nung rongsenkettüנג jenjang majung, saka komaser Pakistan Navy kanga renlokerar memetet, ta ashi.

"Indian Navy temi asen kidanger linüktem nungi amokmeren balala koktetsü atema renema dang lir," ta pai metetdaksü.

Paisa, taruba kum 10 tsüngda India nung raraba rong 95 bendenloksü aser 2047 kum tashi nungbo tarutsü tensa den medema naval force renloksü, ta ashi.

Nuclear attack submarines (SSNs) ana yanglutsü atema Cabinet Committee on Security-i agizükba dak sendakba nung Admiral Tripathi-i, mezüngbuba subramine ji 2036-37 kum tashi nungbo renemtsü iba süalen kum ana lir tanabubaji renemtsü, ta metetdaksü.

SSNs anaji ajanga Navy tashi itshitsü, ta pai ashi.

Indian Navy jenjang tajungba akümtsü atema France dang nungi Rafale-Marine 26

alizüksü atema tezüngzüktep agitsü aser ano Scorpene submarines asem alizüksü atema taruba ita tezüngzüktep agitsü, ta paisa metetdaksü.

Yaküm July ita nung defence ministry-i France dang nungi Rafale-M jets alizüksü atema agizüka liasü. Item jets ji linük nung yangluba INS Vikrant rong nung amenoktsü.

Indian Navy indang Project 75 kübok India nung Mazagon Dock Limited (MDL)-i Naval Group of France den senteper Scorpene submarines trokbo yangluogo.

"Pakistan Navy jenjang tajungba akümbaji onoki tenük yoka repringdar. Taruba kum 10 tsüngda raraba rong 50 alitsü atema parnoki nükjidong yur inyaker. Pakistan nung rongsenkettüנג jenjang mejungi aliba apibo rong aika yangluba, rong aser submarines aika anguba ya mamangteter," ta pai ashi.

"Atangji parnoki (Pakistan) nübur taküm jenjang tajungba akümtsü atema inyaksü melen raraba hadir nung ang temelung agütsür," ta pai ashi.

Admiral Tripathi-i, China-i Pakistan Navy tashi itdaksüner, kechiyong Pakistan nungeri raraba rong aser submarine ji China teyari ajanga yanglur, ta ashi.

Osangbenertem senden nungjisa Admiral Tripathi-i "Indian Navy Vision 2047' document sayaogo. Iba document nungji taruba kum 25 tsüngda Indian Navy jenjang tajungba akümtsü atema asalentongtem lir.





# TIR YIMYIM

## YIMOBILEM (EDITORIAL)

DIMAPUR AMUNGNÜ, DECEMBER (LUCHII) 08, 2024

### Tajung ametang

**K**echi nü dak tajung lir, aji jungjunga ametang mesüra temeneni ibaji menentsütsü. Asenoki repranga lia nisung tajung aika tamajung kuma aoba angur. Itemji pei dak aketba shisatsü aser sempet tajung jungjunga mametba ajanga lir. Temeneni teti asenok dak aketba jakla yimya aser sempet tajung menentsütsü atema mapang tajung repranga atar. Kodang Tsüngremi Adam aser Eve na nem agütsüba jangratemtsü taküm aser rongsen satani angu, satan jagi idangjisa item tajungtemji tena taküm nungi bener aotsü asoshi tasa yanglutsü tenzük. Kodang David chuba dak Tsüngrem akümtsübuba shisatsü tajung angu, satani idangjisa pa taküm jakla menentsütsü apuso. Aji oda, Adam o Eve na aser David taküm tapayutsüka satani menentsüba asenoki lai nung azünger. Iba amaji asenok shia dak sempet tajung keta lir aser asenok kibong shia nem temoatsü tapu balala agüja lir. Item sempet aser temoatsü manung asenok jangratema alibaji satani angur. Asenok ajaki Tsüngrem akümtsübua peisasa pei azüoka alitsü meranger. Iba jagi asenok dang Tsüngremi kanga pelar saka satanbo item tajungtemji ngur kanga mepelar. Tanü asenok rongnung kibong aika jangratema aliba mapang raksabaji, asenoki asenok akaba tajungtem jungjunga mametba ajanga satani rakzüka bener aoba mapa ka asütsü. Nü dak sempet aser jakla yimya tajung alibaji tangari tenükmeremtsü. Nai nüsasa azüoka Tsüngrem akümtsübua alibaji tangari menütsütsüa akok. Nai tangar yariba aser tenla tajung agütsüba nung tenüngsang mangutsüa akok. Item ama tajung anema asenok jashitsüsa aser tezü adangtsüsa aruba shisatsü ajakji satani asen dak aketba tajungtem bener aotsü merangba mapatem asütsü. Itemji asenok asoshi tatidang asütsü. Aji oda, asenoki asen akaba tajungtem dak jungjunga mametra, asenok dangi tejashitsü, tezüdangtsü aser azüapongtsü mapang arudang, asenoki item tajungtemji chiokadoktsü aser satani bener aotsü. Tsüngrem mapa atema tenla tajung agüja aliba tanemtanemi anenba, sarasadem nung tashimait akümba, Tsüngrem o bushitsü amadokba mapatem ajakji asenok taküm nung tajung alibatem menentsütsü atema satani inyakba mapatem asütsü. Ibayongji, 1 Tesalonika 5:21-22 nung ashir, "ajak tendanger tajungba ametang aser tamajung kechisarina nungi pilaa liang." Aji oda, asenok dak aketba tajung ajunga ya satani rakzükner asünungji, kechi tajung aji jungjunga amettsü aser tamajung ajak nungi pilaa alitsübaji asenok Khristan pur shia anogo shia teinyaktsü asütsü. Kibong nung apuani aser tanurtemji Tsüngremi agütsüba temoatsütem lir saka itemji menentsütsü atema Tsüngremi asenok dangi nüktapangtaba temenen tatidang yoker. Asenok nem moatsüba rongsen agi asenok peria jangratema alir saka iba tepela taküm kibong menentsütsü atema satani asenok dangi rongsen nung morumoruba temenen tatidang yoker. Itemji koktettsü atema asenok taküm ya teti sarasademba aser teti Tsüngrem o bushia aliba taküm asütsü nungdaker. Asenoki asenok dak aketba tajung aser temoatsütem ya teti asoshi lir ta mebilemstüla. Itemji asenoki tamshi meshira temeneni bener aotsü aser asenok tazüngla taküm akümtsü. Aji oda, teti Tsüngremi agütsüba temoatsü aser sempettem amshia jangratema alitsü asoshi Laishibai lenmang tajung ka sayua lir, ibaji - "tamajung ajak nungi pilaa alitsüla." Tamajung nungi pila nung dang asenok dak tajung aliba jagi mapa tajung aika inyaktettsü aser Tsüngremi moatsüba tajung ajak agia jangratema alitsü.

## OLEMSABANG

### SHIDAK AMAI JEMBIA INYAKER SAKA SHIDAK MASÜBA OREN KAR TONGMELANG AGI METONGSHIA ZÜLUR

~ S. TEMSÜ, DIMAPUR

#### TEKÜLEM SENTEP NUNG:

- \* Teti aküm tsübua aliba pastor/menden ta ashiba ya melena Christa nung temeim pastor/menden ta dang ashi tajungba.
- \* Sarasademba ya Tsüngrem den indang indanga jembeba lir. Aseni amangba Tsüngrem ya atammeta Tsüngrem ka masü. Sarasadem dang menüngdakba aser tongtimbang masüba tembo mashi tajungba. Kechiaser sarasadem aikati onük aika shir külen tatempanglen "Tongtimbangsa/ Talisa" ojang inoker. Kodang iba ojang inoksemdir, tetenzüklen ashiba onüktemji tongtimbangbo masü kumadoker. Anungji, tongtimbangsa/ Talisa o jangji mennok nung tajungba asütsü.
- \* Tangar asoshi sarasadem dang, sarasademtsür ta masü, sarasadem ta dang asübaji tajungba.
- \* Tekülem sentep nung adianutem ta masü, amangbapurtem ta ang ashi tajungba.
- \* Lokti sarasadem dang ajaki angashitsüsa aser ano külemi medem medema "AMEN" ta asütsü atema nisung kari nisung ka tenung teta shir pai sarasademji tembangang ta ashi nung, lokti sarasademji tatembang ata-a lir pa sarasademji tenzükabajibo kanga shidak masü. Anungji lokti denji külemi sarasadem, ne olaji tera saküta tur oren ana asem kati tembangtsü nung tajungba aser shidak asür.
- \* Sarasadem tatembang nung nisung kari sentsüwangshi ne meyong süang ta ashir aser ano kari sentsüwangshi teti ne meyong süang ta ashir. Aseni amangba Tsüngrem ya teti ainketer, sayatenya aser sentsüwangshia liasü, lir aser anosa lijen alitsü. Saka kodang sentsüwangshi ne meyong süang ta shidir, Pa dak sentsüwangshiji makai aliba sarasademsang jagiang sentsüwangshiji agütsür amai asür. Anungji, shidi süra, "SENTSÜWANGSHI TETI NE MEYONG'SA' SÜANG," "SA" ji inok nung dang shinüba orenji shidak asür, aser laishiba nungi Tsüngrem pushiyim nung maipelener.
- \* Nisung kari yamai jembir- Sarasadem ka agütsüi aoer mesüra sarasademi aoer. Item melena sarasademtsü aoer ta jembibaji ang shidak lir.
- \* Tekülem nung Laishiba tapu kar nungi tekong kar zünger kelen nisung kari, "YA TSÜNGREM O LIR," ta ashba oren ya mashi tajungba.
- \* Tekülem sentep nung Tsüngrem tenungsang ken atandang tekong kar züdoker aritepaa Tsüngrem külemra aji chichiba tekülem masü.
- \* Tanüla Temeshi alua ta masü, saka Tanüla Temeshi arua ta ang ashi tajungba.
- \* Sayutsüngi dang Tsüngrem oji reprangdangra ta masü Laishibaji züngdangra mesüra züngra ta ashi tajungba. Reprangdangba aser züngdangba anaji tetezü balala lir.
- \* Tekülem sentep nung Laishiba azüngdang, "Ni yamai azünger," ta ashiba orenji tai lir. Yamai azünger ta kodang shidir, senteba alirtem jagi Lai azüngba yimyaji memetetba agi Laishibaji yamai azünger ta ashir amai angateter. Anungji, koba kaküt nungi südir, iba tapu aser tekong (chapter and verse) nungi ni asenok den azünger ta ashibaji ang shidak asütsü.
- \* Yisu temeim salem "abener" ta masü, Yisu temeim salem bener arur mesüra, Yisu temeim salem lemsateber ta ashibaji ang shitak asütsü. Abener tetezü ni iba khu kü kolak nung abener mesüra ni iba oset ya abener ta jembir. Yisu temeim ya tamanger shia dak lir aser iba temeimji asenok o asenok tsüngta lemsateperba dang lir.
- \* Sayutsüngir kari pai shinüba sayutsüngi o tem renema bener aruer aser yamaji pai shinüba otemji shir külen "ta ni shinür" ta bangpet süa jembir. Shinüba oji shiadoker, saka ano shinür ta ang ashir. Iba orenji tetezü maka sür jembir.

#### ASÜPILA SENTEP NUNG:

- \* Tamangertem kar atemabo tasüba ya tako masür aser tejashia masür. Kari yamai jembir, "Ozü asüko mangyim jashi" aser ano kari, "Ozü tako marok ajemdang," ta jembir. Item orentemji melena mangyim molungzürep nung ta-ang jembir tajungba.
- \* Ana aser talang nungi shirnoksa aruogo ta mashi tajungba. Ibai menüngdakba oren ka sür nung angazüktepba jembiteber. Ibai melena, "Shibasa aruogo, ajak kanga pela-a agizüker," ta ashibaji tongmelang aser tajungba lir.
- \* Asüpila sentep tatemlen Tsüngrem O ta sür pastortemi jembir dang tesentepertem taküm aser tanüla nung renemshia alitsü ayongzükba ya tongtimbang masü. Tasür kinungertemji, tsürabur, jalajabaso, adianu, sososemdangsem aser temeim medemsortem süadoker temolungjang aser shisatsü pokmar odi ta mulungzürepa nüktzü yima tajeba tia nung alirtemji Tsüngrem O tapet kar agi anisüngzük ngutettsüsa jembira ibaji-ang tensa mapang denji apeter aser tajangzük asütsü. Nisung shia tangatetba terara balala asür. Yamaji magizüktettsüsa zülusema lira metongshijangma. Iba jagi aika ajangzüktsü.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**



# Franklin Graham sentong ka nung nisung 1,200-i Khrista agizük



Vietnam nung Billy Graham Evangelistic Association (BGEA)-i ayongzükba 'Season of Love Festival' sentong nung tangokba noksa nung angur.

**December 07, 2024:** Tan hopta tetenzüklen Vietnam linük nung aliba C?n Th? Stadium nung nungtu sayutsüngir Franklin Graham sentong ka nung nisung 24,000 shi aden aser nisung 1,200-i Yisu Khrista agizüka Pa sülen anidaksü telemtetba agiogo.

Anogo ananü sentong 'Season of Love Festival' sentong nungji Khrista osangtanjung angatsü atema nisung aika adenshia liasü.

Billy Graham Evangelistic Association (BGEA) nung Tir aser CEO, Franklin Graham-i, "Khrista osangtanjung ajanga oshi aser sobaliba ajak ajanteter. Nisung noklang aika melungjang nung kongshia aikati Yisu Khristaji pei Kümtetdakba aser Kibur ta agizüka taküm piyong Pa sülen anidaksü atema telemtetba agiogo," ta metetdaksü.

Anogo ananü sentong atema Vietnam nung Arogo 315 den pastor tem aika longjemer sentong renemba den külemi sarasadema aruogo.

Mezüng aonung iba sentong nungji nisung 14,000 aden; tzunglu aruaka nisung 10,000 shibo timtema arema tzunglu nem ajadakja iba sentong nung aden. Iba sentong nung nisung 1,200 dak temai Yisu Khrista nem pei taküm bendanga agütsü.

Bodhbarnü Franklin Graham-i, "Laishiba nung tzunglu ya Tsüngremer

temoatsü indang temaitsü ka lir, aser tanüa Tsüngremi Vietnam madak temoatsü meküploktsüogo. Taonung nisung aikati Tsüngremer tajaba angateta tamang agi Yisu Khrista agizüka atema pelar," ta metetdaksü.

BGEA-i ashiba agi, communist linük Vietnam nung ya Khrista osangtanjung lemsatepsü atema maongka aika ngudar.

Tamalen Festival Director Derek Forbes-i, "Khrista temeim lemsatepsü atema onok iba tesem jagi aotsü. Item ama outreach sentong agitsü atema sorkari onok nem maongka maneni agütsür," ta metetdakja liasü.

BGEA-i 2017 küm mezüng Vietnam linük nung evangelistic outreach sentong agia liasü. 2017 küm BGEA-i Vietnam nung Love Hanoi Festival agi aser yaküm Ho Chi Minh City nunga Spring Love Festival agia liasü.

Taküm parnoki Mekong River Delta, C?n Th? nung iba sentong ayongzüka agi.

BGEA-i ashiba agi, timtem liaka Buddhist yimsü amanger nütsüng teimba aliba yimi nung mamangertema aika aden. Item sentongtem nung Charity Gayle, The Afters aser Vietnam nung osangtanjung kentenertemi shilem agi aser Graham-i Tsüngrem O jembia liasü.

Lokti den jembidang Graham-i, "Nenok tanela kümzüka lir asü aser ajak

takoksang Tsüngrem ket nung lir asü? Tsüngrem dangi aotsü atema lenmang aika mali. Lenmang ka dang lir aser ibaji Yisu Khrista Kangki ajanga lir," ta ashi.

Arrshi küm 60 tantsür ka, Nguyen-i BGEA dang, "Ni Yisu indang aiben angashidangogo saka ni Pa sendoka liasü. Ni tainlonglong asüba mapang nungi ni Yisu sülen anidaksü memelum kechiyong Buddhist yimsü den mesükteper," ta ashi.

"Ajisüaka Graham-i sayutsüngiba ajanga ni teimla tasen ka nguogo. Franklin Graham-i jembiba o ajak ni angaogo. Ni Yisuji kü Kümtetdakba ta amanger aser kü Kibuba ama Yisu sülen anidakner," ta laisa lemsatep.

Nguyen ama nisung aikati Yisu Khrista nem taküm bendanga agütsüogo.

"Tsüngremi mapa inyakba aser taküm aika teti atema melenshitsuiba atema onoki Pa nem tenüngsang agütsür," ta BGEA-i X ajanga metetdaksü.

Graham-isa alima tesem balala nung Khristantem dang Vietnam nung tamanger tasenpurtem atema sarasademjang, ta mepishia metetdaksü.

"Nisung aikati Tsüngmer tajaba meteta tamang agi Yisu Khrista agizüka atema pelar. Item tamanger tasenpurtem aser yangi aliba Arogotem atema nenoki sarasademtsütsü asü?" ta Franklin Graham-i lemsatep.

## ANOGO ABEN TSÜNGREM DEN

### TEMULUNG LEMTETBA

*Shiba dak kanga tila nung temulung lemteter, pa dak jenti nunga temulung alemtsü, saka shiba dak tila ka nung temulung lemteta mali, pa dak jenti nunga temulung malemstü. Luk 16: 10*

Ochi mashiba ketdangser agi o-entepba ka nütsüngtem den Yisui jembiba yangi angur. Temulung lemtetba taküm asütsü ya tular tilar aser takar makar lemsatsü makok, saka nisungba dak dang keta lir. Tangari nisung kaji kotetka agizükteter. Na/ni koma temulung lemtettsüla nisung asü masü, ibaji tongtipang lir. Iba ya anogo shia, mapang aben aser ajak nung koda asen taküm Yisu den tesendaktep alir iba dakji keta lir. Tila nung temulung lemtet nungang tulu nunga temulung lemtetbaji tenzüksü. Ano kasa temulung melemtetbajia tila ka nungiang tenzüksü. Meimchir temenen-a tulu aser tila ta kecha mali temenenji temenen lir. Koda Tsüngrem tenzükbaaji Tsüngremi agizükteter asü masü ibaji asenok ajak asoshi kanga tongtipang lir.

Taküm ka tangari akhümtsübuttsü aser agizüktettsüabaj? kanga tongtipang lir. Nisung madang tagizüktettsü masüba aser akhüm tsübuttsüsa melitetba tamanger taküm kaji Temeshi Tsüngrem madang memerüka aser memedenba pur asütsü. Pa madang memerük aser memeshiba kecha alitsü makok. Tsüngremi aser nisung madang temulung lemteta alitsü merangdi. Amen

# Indonesia nung Muslim nungertemi choir ken bushiba nokdang

**December 07, 2024:** Indonesia nung Muslim nungertemi nütsüng teimba aliba yim ka nung December 1 aonung Arogo choir tem Khristmas ken bushiba mapang nung Muslim nungertemi nokdang, ta osang ka ajanga metetdaksü.

Khristantemi yim dak yimsüsürtem dang nungi tama temelaba meshitsüla, ta Muslim nungertem jagi metetdaksü.

Ujungbulu District kübok Caile yim dak Neighborhood association nung Tiri Catholic St. Yoseph Station Arogo nung züngsemtem dang, "Choir ken bushitsü atema local sorkar dang nungi temelaba meshitsüla," ta ashiba video ka TikTok account @sellss aser tanga social

media sabang balala nung prokshio.

Neighborhood association Tir, Andi Arman-i Arogo choir aser Muslim nungertem tsüngda yimjung yanglutsütsü meranga pai choir züngsemtem dang, "Mezüngbuba nung ni ya Muslim nungertem dang shineritem ama sentongtem alitsü. Nenokia (Khristantem) temelaba meshira ni ibaji local sorkar nem metetdaksütsü," ta ashi.

Osangbener den jembidang Andi-i, "Yim daklirtemi ibaji tekülem sentong ta bilema kü dangi aru saka ibaji Khristmas atema ken bushiba dang liasü," ta ashi.

Paisa, yim dak Muslim

nungertem aser Arogo tsüngda tezüngzükteper ka agia iba tesem nungji tekülem sentong magitsü bangzünga liasü, ta ashi.

"Lokti tsüngda rara madoktsü atema ni inyakogo. Khristantem kümzüksü atema ni yagi aru. Parnoki temelaba meshi asübo tangartemi (Muslim nungertemi) parnok menokdangla," ta paisa metetdaksü.

Arogo nung züngsem kati, "Arogoi multipurpose building nungji kodanga tekülem sentong magi saka ken dang bushir. Iba building ya Tsüngrem külemstü atema asü, saka yim daklir Muslim nungertemi ashishiba agi tekülem sentong magir," ta ashi.

Laisa, "Onoki Muslim nungertem aliba tesem nungi talangka pikar Arogo nung züngsem ka kidang dang tekülem sentong agir. Onoki Arogo dak sendakba tanga sentongtembo multipurpose building nung ya agir," ta metetdaksü.

Indonesian Movement for All telokia iba tatalokba aija, "Choir practice atema temelaba menüngdaker. Choir practice nokdangertem nem tangsa temerenshi agütsütsüla," ta ashi.

Muslim nungertem lenir, Ustadz Andi Satria-ia, "Khristmas benjung atema ken bushiba mapang amokmeren masütsüla. Islam yimsü ajanga meimchir ajak temoatsü atema aremzüktepsü tesayuba

agütsür," ta ashi.

Paisa, "Practice asütsü atema-a temelaba nungdakra sorkarji tenokdang ka masü saka tekümsüka ka asütsüla," ta ashi.

"Asen linük ya yimsü ka dang amangba linük ka masü, kechiyong linük temzüng ajanga ajak nem yimsü temeden agütsür," ta paisa shisem.

St. Mary of Fatima Parish nung tongti, Immanuel Asi-i, "Tangbo iba mangatettep ya bentetadokogo, anungji telok ajak dang pelar," ta metetdaksü.

Alima nung Khristantem alitsü linük tamajungtiba 50 rongnung Indonesia ya jenjang 42buba nung lir (Open Doors' 2024 World Watch List).



AO OSHI ANGAZÜKDAK:

TANÜ ANGAZÜKTSÜBA OJANG



Tatala

(adv) mezümgmeshia sensamasatsüba (mocking)

\*Tsüngrem temeim angateteremi tatala aremer.

Tatar

(n) yimten tashi agi atartem, yimsüsür (parliament/village council member)

\*Yimtak tatar yimsüsürtemi temzüng ozüing lateter.

OLONG PAITEP # 7005

15x15 crossword grid with numbers 1-16 indicating starting positions.

TIPLÉN

- 2. Auonungchiyongsü asenba
5. Mangyimba mapang
7. O tamendakdak
8. Peidak malangba
10. Juli
12. Sen ayudak
14. Tenük agi ajitet
15. Tamajung aküm
16. Apuso

LANGTSÜNGLEN

- 1. Lenmang
2. Aor kidong ka tenüing
3. Tenarong maten
4. A\_\_\_g
6. Mopung apodoka
9. Tongtipang tagitsü
10. Menungra bilem
11. Aiür
13. S\_\_\_k
14. T\_\_\_r

OLONG PAITEP # 7004 TELANGZÜBA

TIPLÉN :

- 1. Alang, 3. Pakti, 7. Bangka,
8. San, 9. Menunrar, 10. Ken,
14. Kümzüik, 15. Anema,
16. Kimen.

LANGTSÜNGLEN :

- 1. Amena, 2. Aibelen, 4. Ayak,
5. Tenyar, 6. Ngs, 8. Sangküm,
9. Menden, 11. Milen, 12. Aküm,
13. Ama.

NAI-A YA METETTER MA



Arishi küm 100 tain Bernie Littman aser arishi küm 102 tain Marjorie Fiterman nati Guinness World Record ka yangluogo. Tena ya alima 'oldest newlyweds' lir aser tena indang arishi küm külem süra küm 202 lir. Iba otsü ya Guinness World Records-i December 3, 2024 nü official süa agizükogo.

Küm 9 tejakdang Philadelphia nung tena senior living community ka nung alidang meimteptsü tenzüik. Tena mezüng costume party ka nung ajurutep aser idangjisa sakloktep aser taküm May 19 nü kibong aküm.

Asia nung spoken festival tulutiba Shillong nung among



Shilling, December 7, 2024

(Agencies): Asia nung spoken festival tulutiba tang mezüng atema Wards Lake, Shillong nung agiogo.

Iba sentong ajanga poets, writers, aser storytellers-i parnok mapa lemsateptsü aser tangar den shisalemsateptsü sabang agütsüogo.

Iba sentong nung Department of Tourism, Government of Meghalaya ajanga yaritepa liasü.

Sentong nung Tourism Minister Paul Lyngdoh aser Tourism Director Cyril VD

Diengdoh naprong aden.

"Meghalaya nungeri iba sentong nung yaritepba atema kanga pelar. Iba ama tourism aser arts & culture ajungkettsü sentong agiba atema pelar" ta Paul Lyngdoh-i ashi.

Meghalaya nung lisopur kintem putiotsüji tebang otsü dang lir. Anungji iba amala sabang ajanga lanur poets, writers, storytellers-i külem nisungtem den tebilemba lemsateper aser iba ajanga Meghalaya ajangzüktsü, ta paisa ashi.

Iba sentong nung singer-

songwriter Clayton Hogermeer aser Shillong nungi singer cum poets- Vancouver Shullai o Marbamonlang Rani nungeri shilem agia liasü.

Maneni festival hip-hop/R&B artist Meba Ofilia, hip-hop duo Khasi Bloodz, Merenla Imsong, Lalnunsanga Ralte, aser Madhu Raghvendra nungeria shilem agia liasü.

Shillong edition atema storytellers rongnung Amol Parashar, Merenla Imsong aser poet Trinetra Haldar nunger liasü.

Assam police-i highway nung Rs 1.5 crore auyartem apu

Guwahati, December 7, 2024

(Agencies): Assam police-i October 26 nü Dharamtul, Morigaon nung highway nungi auya bener aoer nisung 8 puogo.

Iba auer telok yagi national highway nung truck gari ka nungi Rs 1.5 crore shi alang osettem auyazüka bener ao.

Additional Superintendent

of Police (ASP) Samiran Baishya lenisüba kübok police telok kati Assam aser India kübok tesem balala nung bushisüngdanga aruba sülen auertem apu.

Iba auer telok yagi mapang talangka highway nung auyaba mapa inyaka aru aser iba ajanga tongtipang lenmang aika nung logistics & transport atema

timtem agüja liasü.

ASP Samiran Baishya-i bushisüngdang aruba osang lemsatepba den national highways nung security akangshitsü metetdaksüogo.

Assam police-i state ajungalen goods aser commuters lendong nungi jenbua lidaktsütsü atema akokba tashi mapa inyaker ta pai ashi.

Manipur lanur kati President's Bronze Medal anguba atema tushi



Imphal, December 7, 2024

(Agencies): Manipur nungi Cadet Jodha Thongjaomayum-i National Defence Academy (NDA) 147 buba course passing out parade nung President's Bronze Medal anguba atema Indian Army-i tenüngsang agütsüogo.

November 30, 2024 nü

Khadakwasla, Pune nung President's Bronze Medal anguba atema Cadet Thongjaomayum nem par tsürabur tsüngdang tetushi agütsüogo ta Indian Army-i ashi.

Cadet Thongjaomayum ya Imphal East district nung Khurai Thoudam Leikai nungi lir. Pai 2014 nungi 2016 tashi Sainik

School, Imphal nung azüing aser iba sülen 2017 nung Rashtriya Indian Military College (RIMC), Dehradun nung azüngtsü tenzüik.

Thongjaomayum-i 2021 küm RIMC nung züngtem aser iba sülen January 2022 nung NDA 147th course nung aden. Idakji pai küm asem military training agia liasü.



# Syria nung sorkar anemba teloktemi Daraa yimti atsüngogo



Syria kübok Hama yimti anasa military airbase ka atsüngba sülen sorkar anema raraba sepaitemi Syrian army jet tem asadanga mapang tangokba noksa nung angur.

**Damascus, Luchii/December 7 (Agencies):** Syria sorkari Daraa yimti mazüokteti kümogo, ta war monitor kati ashi, koba tir Bashar al-Assad asoshi takoksa tulu ka lir, kechiyong sorkar anema nokdakba teloktemi tanga tongtibang yimtitema atsüngogo.

Syria nung civil war mapang Daraa dang ya "the cradle of the revolution" ta ja liasü. 2011 küm school ka indang jara nung Assad anema graffiti yangluba atema tebur chanu telok ka pua rishikangshiba atema activities temi sorkar aija liasü.

Aleppo aser Hama yimtia sorkar-i azüoker aliba tawa telungpur telok kati atsüngogo. Daraa yimti ya local telungpur telok kati atsüngogo, ta Syrian Observatory for Human Rights-i metetdaksü.

"Daraa yimti densema Daraa province nung tesem timba local telungpurtemi atsüngogo.. Parnoki iba province shilem 90 dak tema atsüngogo aser kasa mapang nung sorkar sepaitem atsünginogo," ta Britain nung amendaker aliba Observatory yagi ashi, shirnok osang balala atema Syria temeket nung aliba source tem dang metaloker inyaksangshir.

Russia teyongsüi ia rara anentsü asoshi tenangzüktepba yanglu liaka iba province nung küm ishika tsüngda mepetmesü adoka arudar. Iba rara nung Russia-i Assad nem teyari agüja arudar.

Syria nung civil war koba Assad-i democracy dak sendakba nung longkak aitba tashiyim agi azüoktsü merangba sülen tenzüka liasü, iba rara nung nisung 500,000 dak tema

tepsetogo aser nisung million tesadang ka dak tema pei ki toktsür jena aotsüsa kümogo.

Rara tenzüker tang ama Assad indang sepaitem khen danga tamakok ngua mali, kechiyong parnoki mapa tatsüka tsüngda telungpurtem nem tongtibang yimti aika atsüngdaksüogo.

Islamist Hayat Tahrir al-Sham (HTS)-i aniba telungpurtem telok ka yagi November 27 nü nungi tesem balala amak tenzüka sülen parnoki Aleppo yimti tama atsüng aser iba sülen central Syria nung Hama yimti atsünga liasü.

Linük anütoklen Deir Ezzor nungi sorkari sepaitem aninba mapang telungpurtem ya Hokolbarnü Homs yimti kikümtong tongogo. Homs ya Syria nung yimti tulutiba rongnung tasembuba lir.

Hokolbarnü sayaba interview ka nung HTS lenir Abu Mohammed al-Jolani-i ashiba agi, Assad atsüngtoktsü nükjidong nung parnoki iba jenjang agi tenzüko.

HTS ya Al-Qaeda indang Syria kongsang ka ama züngshir. Iba telok ya anüolen aliba sorkartemi kiralongrar telok ka ama agizükogo.

Army aser Iran-i teyari agütsüba militia tem Syria anütoklen Deir Ezzor nungi atsünginba mapang Kurdish-i aniba sepaitemi ashiba agi, parnoki Euphrates ayong adena ao aser azüngtettsür aliba tesemtem azüoka liasü.

Observatory-i ashiba agi sorkar sepaitem aser parnok den sendaktepa alirtem linük anütoklen nungi ajungbena dang atsüngin aser Homs-i aoba lenmang nung Palmyra yimtileni

oa liasü.

Kurdish-i ashiba Syrian Democratic Forces, shirnok nem United States-i teyari agüja arudar, parnoki Turkey aser telungpurtem den sensaksemsü mulunga aliba lemsatetogo.

US Secretary of State Antony Blinken-i, mangatettep adoker aliba ya yimden yimsüsüba dak ajemdaker bentettsü aser civilian tem aser lokti nung nübu agi ajema aliba teloktem kümzüka toktsütsü atema ayongzükogo, ta pa indang otongdar-i Hokolbarnü Turkish Foreign Minister Hakan Fidan den jembiba mapang ashi.

Lebanon nung Israel aser Hezbollah na ceasefire benokba anogo Syria nung telungpurtemi tesem balala amak tenzüka liasü.

Lebanon nung amendaker aliba telok ya Russia aser Iran na den Assad pusemer ka lir.

Iba rara nung Turkey-i opposition pusema arudar aser ashiba agi, parnoki iba hopta tatemi Russia aser Iran na den sensak asemsü.

Sensaksem maka tsüngda Iran, Iraq aser Syria foreign minister tem Baghdad nung ajurutepogo, kong Syria foreign minister Bassam al-Sabbagh-i, political map yanglushitsü merangba atema sorkar tsükchirtem aija liasü.

Iran foreign minister Abbas Araghchi-i, Assad sorkar nem takok tashi teyari agütsütsü tenangzükba agütsüogo.

Ajisüaka Teehran-i, diplomatic staff kar densema military commander aser personnel tem Syria nungi anin tenzüko, ta New York Times sangdong ka ajanga metetdaksü.



CENTRAL UNIVERSITY OF GUJARAT

(Established by an Act of Parliament of India, No 25 of 2009)

Sector-29, Gandhinagar - 382 030

Ph. No. 079 23977407, Fax: 079 23260076

E-mail: recruitmentcell@cug.ac.in. Website: www.cug.ac.in

## EMPLOYMENT NOTIFICATION No. CUG/02/2024-25

Temsüa aliba India nungertem all India basis nung Schools/Centres/Departments balala nung Teaching aser Non-Teaching mapa atema indang indanga shimtsü asoshi Online Applications tem jaoker.

Advertisement indang osang tejangja, kong mapa asoshi shimtsü atema specialization, eligibility criteria aser terms & conditions densema lir, iba ya University website www.cug.ac.in. nung angutsü. Online Application ya 10/12/2024 nungi agizüktsü aser 09/01/2025 nü shibangtsü.

Date: 06/12/2024

CBC 21357/12/0004/2425

Sd./- Registrar (Offg.)

# Israel nunger sepaitemi Nuseirat refugee camp amak



Israel nunger sepaitemi central Gaza Strip Nuseirat refugee camp amakdang raksatsüba noksa nung angur.

## Gaza, Luchii/December 7

**(Agencies):** Israel nunger sepaitemi central Gaza Strip nung amenoka aliba Nuseirat refugee camp nung ki ka anüng ajanga maka tanur aser tetsürtem densema nisung 26 tepset aser nisung 60 dak tema yirusüogo, ta Al-Awda Hospital sangdong ka ajanga metetdaksü.

Hokolbarnü nikongtsütsü iba tesem amakba mapang temeket nung aliba kitema aika raksatsüogo, ta civil defence agency otongdar Mahmoud Basal-i AFP news agency dang ashi.

Beit Lahiya nung Kamal Adwan Hospital aser northern Gaza nung iba mozüki temeket nung aliba tesemtem sabanger aliba mapang ka nung Israel indang military-i taoba anogo ishika tsüngda iba tesem kanga sashia maka arudar.

Israel nunger sepaitemi tesem balala amakba indang video ka nung Israel nunger sepaitemi Palestine Red Crescent Society ambulance ka dak injang khaloktsüba nguogo.

Hokolbarnü Israel nunger sepaitemi Kamal Adwan Hospital nung nisung 30 shi tepsetogo, ta mozükidang nursing director Dr Eid Sabbah-i ashi.

"Onoki memetetba nisungtem uniform balala asema den prangbong aser hadir balala aser speaker bener mozüki telungi yoka liasü," ta Sabbah-i ashi.

"Parnoki shirangertem aser medical staff tem densema mozükidang nungi nisung ajak anintsü atema hospital director Dr Hussam Abu Safia aser pa kübok inyakerem dangi osang yoka liasü," ta paisa shisem.

"Iba tesem amakba sülen mozüki telung nung staff pezü densema nisung 30 tepsetogo.

Israel nunger sepaitemi item nisungtem dak rangloker inyakshi aser tepseta liasü," ta pai ashi.

Tenük kuli agütsürtemi ashiba agi, Israel nunger sepaitemi mozüki telung nung Palestine nungertem amaktsü atema drone tema amshia liasü.

Medical facilities, staff aser garitem ya Geneva Convention kübok kümzüka lir.

Norway nunger doctor Mads Gilbert, shiba Gaza kübok tesem balala nung emergency surgeon ama inyaksangshia arudar, pai ashiba agi, Israel military-i iba medical facility ya sang ama amshir.

"Iba ya aiben ataloka arudar. Israel nunger sepaitemi temeket nung aliba tesemtem amaker aser iba sülen nüburtem teyari asoshi mozüki dangi aoba mapang parnoki mozüki amaker," ta Gilbert-i ashi.

"Anungji Israel military-i Kamal Adwan ya parnoki punüba nisungtem aputsü aser tepsettsü atema sang ka ama amshir," ta pai ashi.

Hokolbarnü Gaza nung amendaker aliba Palestinian Health Ministry-i, Kamal Adwan nung rara nung aibelenba atema Israel military aitsüogo.

World Health Organization-i ashiba agi, Israel nunger sepaitemi staff tem nem tekümdangtsü osang magütsü iba facility makogo.

Kasa mapang nung Israel-i ashiba agi, Gaza nung ita 14 raraba mapang Hamas nungertem mozüki aser school densema civilian building tem parnok inyakyim balala atema amshir.

Palestinian Health Ministry-i ashiba agi, north nung mozüki tongtiba asem kanga atonga amakba ajanga junga inyaksangshi mesüteti lir.

GOVERNMENT OF NAGALAND  
DIRECTORATE OF HEALTH & FAMILY WELFARE  
NAGALAND: KOHIMA

DHFW-8/MRHRU/2024 /8799-800

Dated Kohima 6th Dec. 2024

### ADVERTISEMENT

The Model Rural Health Research Unit (MRHRU) Nagaland located at CHC Niuland- a unit under umbrella schemes established under the aegis of the Department of Health Research, MoHFW, invites proposals from interested researchers/doctors/professors of Nagaland for undertaking research on any issue of regional or national importance on healthcare needs.

The Details and forms can be downloaded from <https://nagahealth.nagalnd.gov.in/>. [https://nagahealth.nagalnd.gov.in/assets/images/documents/Call\\_for\\_proposal\\_Nagalnd\\_MRHRU.pdf](https://nagahealth.nagalnd.gov.in/assets/images/documents/Call_for_proposal_Nagalnd_MRHRU.pdf)

The last date of submission of forms is 14th December 2024.

(DR. E. MOTSTHUNG PATTON)

Principal Director

Directorate of Health & Family Welfare, Nagaland: Kohima.



## Sumit Nagal Australian Open nung indang indanga asayatsü



Sumit Nagal

**Luchii/December 7, 2024 (Agencies):** India nunger tebur tennis asayartem rongnung temaba jenjang nung alisang Sumit Nagal, Australia Open 2025 nung indang indanga asayatsü asoshi maongka nguytetogo. Pa

asayartem rongnung tesülen shimmer rongnung ka lir.

Nagal tang agi Grand Slam main draw pongububa atema direct entry nguogo aser ajak senteper pa Grand Slam tibuba asayatsü lir. Pa 2024 kum Grand Slam pezüprongla nung asayaogo.

Grand Slam asaya aruba rognung pai tajungiba asayabaji takum Australian Open aser US Open nung tanabuba round tonga asayaba ya asütsü.

Arishi kum 27 tain Nagal, shiba Jaitpur, Haryana nung aso, pa tang agi tasembenbuba Australian Open nung asayatsü lir. Iba asayamung atema entry list ya Melbourne nung Hokolbarnü sangdonga liasü.

Nagal ya 2015 kum Junior Wimbledon champion lir, aser iba mapang pa junior Grand Slam title ka abenba India nunger asayar trokbuba akum.

2025 kum Australian Open nung Nagal-i taoba mapang dang nungi tajungba asayateta tasembuba round bosa tonga asayatsü imla atadar.

## Joe Root-i Test asaya nung alizüng tasenka tongtetogo

**Luchii/December 7, 2024 (Agencies):** England nunger asayar Joe Root-i cricket asaya puti otsü nung pa tenüng züngoksema, Test asaya nung run 50 mesüra iba dak timba 100 ben ya gluba England nung rongnungi mezüngbuba asayar aser alima nung asayar pezübuba kumogo.

New Zealand den Honibarnü Basin Reserve nung tanabuba Test asayaba mapang Root-i ball 76 nung half-century 65buba yangluba sülen pai iba alizüng tongteta liasü.

Test asaya 151buba asayaba mapang Root-i iba half century yangluba sülen pa alima nung asayartem tajungtibatem rongnung züngoksemogo. Innings 276 nung century 35 aser half-century 65 yangluba sülen arishi kum 33 tain asayar yagi tang tashi nung Test asaya nung 12,853 yanglur lir.

Root tang Tendulkar, Jacques Kallis, aser Ricky Ponting nunger den densemogo, shirnoki test asaya nung run 50 aser iba dak tema 100 ben dak tali yanglur lir. Tendulkar-i 119 ben aser Kallis aser Ponting 103 ben run 50 aser iba dak timba yanglur lir.

Takum kum tetenzüklen



Joe Root

Multan nung run 262 yangluba sülen Root mapang tatsüka junga masayateti arur tang iba alizüng tongtetogo. Pai innings tenet tashi half century ka danga meyangluteti arur Wellington nung iba half-century yangluogo, aser iba ajanga England team nem teyari tulu agüja parnoki asaya azüoker asayadar.

Iba alizüng tongtetba den Root ano kum ka nung run 1,500 aiben yangluba asayar akümtsü asoshi run 83 dang nungdaka lir. 2024 kum pai run 1,417 yanglur lir. Ricky Ponting kijai 2003 aser 2005 kum Test nung run 1500 yanglua lir. Root-i 2021 kum run 1500 yangluogo aser taküma iba alizüng tongtetsü atema run 83 dang nungdaker.

## Arishi kum 16 tain Gout-i 200m asemtepba nung otsü tasen yanglu



Gout Gout

**Luchii/December 7, 2024 (Agencies):** Australia nunger lanur asayar Gout Gout-i otsü tasen ka yanglua, 200m asemtepba nung pa ya arishi kum 16 asayartem rongnung takaratiba kumogo.

Brisbane nung Honibarnü Australian schools championships asayaba mapang pai alizüng 20.4 second nung tongteta, national record ajatetogo, koba Peter Norman-i 1968 Olympics nung silver anguba mapang yanglur liasü.

Gout-i iba mapang tsüngda alizüng tongtetba ya arishi kum 16 asayartem rongnung takaratiba alizüng tongtetba aser arishi kum 18 tekubok alirtem

rongnung tanabuba lir. Erriyon Knighton-i arishi kum 17 asüba mapang 2021 kum 200m asemtepba ya 19.84 nung tongteta liasü.

"Ni tang tashi mamangteter, saka taonung amoa aoba mapang bilemstsü. Item ya asayar taintem lir aser ni tanur ka dang aser ni parnok ajateta asemer.

"Ni iba otsü tasen yanglutsü bilema liasü, saka takum yanglutsü tabo bilema maliasü. Taruba kumang yanglutettsü akok ta bilema liasü," ta pai ashi.

Gout shiba taruba ita arishi kum 17 ajungtsü, pa ya Australia nunger asayartem rongnungi 100m takaratiba tongtetba

pezübuba kumogo. Hokolbrnü pai 100m asemtepba ya 10.04 second nung tongteta liasü.

Gout ya 6ft 2in talang lir aser pa asema yimya ajanga aikati pa ya Jamaica nunger nungtugu asayar Usain Bolt den medemdanga arudar.

Australian broadcaster ABC-i ashiba agi, Gout Olympic 100m champion Noah Lyles den training agitsü atema taruba ita United States-i aotsü.

Gout ya South Sudan nung migrant ka jabaso lir aser pa Brisbane indang suburb Ipswich nung alir. 2032 kum Olympics ya Australia nung yimti ka nung asayatsü aser iba mapang Gout ya arishi kum 24 asütsü.

## Darragh yipru ajanga Everton & Liverpool na asaya thinen

**Luchii/December 7, 2024 (Agencies):** Premier League nung Everton aser Liverpool na asaya tsüngsang majungba ajanga thinenogo, ta hosts Everton-i Honibarnü sangdong ka ajanga metetdaksü.

Team ana ya Honbarnü Goodison Park nung asayatsü liasü, saka Darragh yipru aitiba ajanga thimentsüsa akum.

Mopung kanga sashia aonba den tzünglu kanga sashia aruba ajanga United Kingdom anüolen kanga mejungi kongshi aser senzüsenpong nung tetsükdaksü adokdakja liasü.

Club anaprongla nungi ketdangsürtem, Merseyside police aser Liverpool city council densema safety advisory group senden ka amenba sülen iba asaya thinentsü atema telemtetba agia liasü, ta Everton-isa metetdaksü.

Everton aser league leader Liverpool napronglai asaya thinenba indang osang metetdaksüogo.

"Tanep club anaprongla nungi ketdangsürtem Merseyside Police aser Liverpool City Council nungi ketdangsürtem dnsema Goodison Park nung Safety Advisory Group senden ka amenba sülen, mopung kanga sashia aoner aser Deobarnü nikongtsütsü 6 ako tashi mopung aontsü takzüteter lir asünung tanü asaya thinensa kumogo," ta Everton-i ashi.

Kasa mapang nung Premier League-i, iba asaya mapang tajungka nung asayatsü atema telemtetba agir sangdongtsü, ta shiogo.

Merseyside police-i Hokolbarnü iba yimti nung alirtem dang tsüngsang tajungba makum tashi nungdak makaba nung mesenzütsü tetuyuba agütsüogo.

"Onok pusemertem atema iba ya tezüdangtsüka asütsü, saka fan, staff aser asayartem kumzüka toktsütsüji ajak dang tongtibangtiba lir," ta Liverpool-i sangdong ka ajanga metetdaksü.

Iba asaya ya Everton indang stadium Goodison Park nung league indang tatembangbuba Merseyside derby asütsü, kechiyong taruba season bo Everton pur ground melentsü lir.

Premier League nung asaya 14 asayaba sülen Liverpool pur tang tanabuba jenjang nung aliba team dang nungi point 7 agi tema sür temaba jenjang nung lir.

Kasa mapang nung tsüngsang majungba ajanga Hokolbarnüa England indang second tier Championship nung Plymouth aser Cardiff nung asayatsü aliba asayatema thinenogo.

Liverpool pur taruba asaya Champions League nung Mongolbarnü Girona den asayatsü aser Everton pur Honibarnü Arsenal den asayatsü.

### BILEMDANGANG

"Ajemalurtemi moa kechiyong parnoki alima senmang amangtsü."